




Nabad Iyo Saaxiibtimo Ayaa Seef Kasta Ka Wanaagsan

Leveled



Af Somali



Buuggan akhriska dheeriga waxaa maalgalisay hay'ada USAID. Waxaana si wada jir ah isaga kaashaday daabcayna hay'ada Save the Children, wasaarada waxbarashada heer federal iyo xafiiska waxbarashada DDSI.

2009 T.I.



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.


For more info please refer: <https://creativecommons.org/licenses/>



Nabad Iyo Saaxiibtimo Ayaa Seef Kasta Ka Wanaagsan

Fasalka 3

Toddobaadka 8



Baraha qaaliga ahow

Waxaa buugan luugu talagalay in uu kobciyo awooda akhriska ee radayda fasalka 3^{aad}.

Waxaaana lagu saleeyay manhajka cusub ee af-soomaaliga. Doorarka baruhu aad ayuu mihiim ugu yahay in ardaydu ka faa'iidaystaan buugan.


Sababtoo ah waxaa laga raba baraha in uu ku booriyo ama ku dhiirigaliyo carruurta in ay akhristaan buugtan. Hadaba baruhu waa in uu raaca talaabooyinkan soosocda, marka ay tahay ardaydu in ay ku akhristaan fasalka gudahiisa.

1. Ka hor intayna ardaydu akhrinta sheekada bilaabin, waa in uu baruhu weydiiyaa su'aalaha ka horeeya sheekada.
2. Waa in uu baruhu ardayda siiyaa waqti fiican ooy ku akhrin karaan sheekada.
3. Baruhu waa in uu usheegu ardayda in ay ku celceliyaan akhriska sheekada.
4. Ardaydu markay dhammeeyaan akhiska sheekada, baruhu waa in uu waydiiyaa su'aalaha ku qoran dhammaadka sheekada.

Laylis

Su'aalaha akhriska ka hor


1. Sheeg saaxiibka fiican?



Bariba waxaa dhacay abaar aad u daran taas oo ku dhufatay deegaano kala duwan. Waxaa gudhay laagihii, wabiyadii iyo baliyadii ay duur joogtu wax ka cabi jirtay. Xoolihii tabarta yaraa way wada dhinteen, waxaana meel walba daadsanaa qalfoofka xoolaha.

Waxaase duurjoogtii abaartu baabi'isay ka soo hadhay doofaar dhaameel ka dayda sabooyinkii ay biyuhu ka gudheen. Iyo libaax sahal u dila oo dhiigga ka caba xayawaankii abaarta u il darnaa. Dhiig iyo dhaameel kaliya laguma noolaan karee, waxay isku dayeen inay biyo raadsadaan. Waxayna iyagoon is ogayn ay biyo u raadsadeen meesha ugu dhaw biyo.


Waxay socdaanba, saddex habeen dhax kadib ayay waxay isugu yimaadeen meel wabi ah isagoo midwalbaaba iskii u socda. Waxay kaliil iyo kuleyl u adkeystaba, wuxuu qoobabkii iyo cagihii qodxo jiiraanba, waxay isku arkeen hiladii wabiga oo ay biyo ku jiraan. Wuxuuna libaaxii qoorwayne isha ku dhuftay doofaarkii oo ku sii foorarsanaya biyihii. Libaaxii ayaa intaa kadib waxa uu ku soo booday doofaarkii.



Naftu orodbay kugu aamintaaye,
doofaarkii oo dhan uu u ordo
waayey ayaa jaantiisa jeeniga midig
kaga muday. Libaaxii oo tabar xumi
horayba u haysatay ayaa halkaas
dhaawac ka soo gaadhay. Doofaarkii
naf la caariga ahaa ayaa mar labaad
hardiyey libaaxii. Libaaxiina xuuxin
iyo xagxagasho ayuu isugu daray
isagoo dusha iyo dhinacyada ka diirtay
doofaarkii.

Arrintii oo car itaabo iyo car itaabo taagan tahay, oonkii saddexda maalmood hayeyna u sii dheer yahay. Baa waxay fiiriyeen geed weyn oo gebiga wabiga ku yaalay. Waxaaba saaran gorgor weynaaday oo abaar iyo oon moog ah, kana noolaaday raqda xoolaha bakhtiyay. Hase yeeshee baryahaan ay yaraadeen xoolihii socod ku soo gaari jiray hiladan wabiga.


Markuu arkay libaaxii iyo doofaarkii jugta isku hayo, oo ay wada dhiigayaan, ayuu qalbiga ka yiri: “Alla kee ugu horeeyaa oo uur ku jirtiisa aan ka noolaan doonaa?” Markii hore, doofaarka ayuu u maleynayay, hase yeeshee markuu arkay sida loo dooxay jeeniga libaaxa, ayuu hadana isagoo hoos u qoslayo yiri: “Aga, midbaan sugayee, waaba labo si xun u dhiig baxayo.



Alla nasiib badniyaa. Gam yalam. Ayaan labadoodaba ka siin ayuu yidhi!” Libaaxii oo ay tabar ka taalo, ayaa yiri: “Ar doofaar, maxaa geedka saaran?” Doofaarkii oo ka cabsanayo in hadalka lagu gaadayo ayaa yiri: “Nin aad dagto oo dam siiso Eebe ha ku siiyo!” “Aga, war doqon yahow, doofaarka doofaarka ahi, sow ma aragtid gorgorkaas geerideenna sugayo?”

“Naargale ayaad tahay, meelna ma dayayo mana ku dhagraaricinayo!” ayuu doofaarkii ku qeyliyey. “Ninba ceesaantiis ceel keenye, war i dhagayso, halkaan labadeenna danbaa na wada keentayee!” ayuu libaaxii ku yiri doofaarkii. Doofaarkii oo wali ka madax adeegayo hadalka libaaxa ayaa ugu jawaabay, “War ninba kastiisa ayuu kor tagaayee, warka iga daah kaskaaga ayaad ka warantayee!”

“Hooge, war xaajo haddaan la rogrogin rag ma helin, war ragbaa Eebe naga dhigay ee...” Intay sidaas isku heysteen ayaa gorgorkii oo haaday. labada baal ku dharbaaxay libaaxii, hase yeeshee doofaarkii oo qooq-qooleynaya carradii uu jaantiisa ku faaganayey kor u seerayo ayaa libaaxii u hiiliyay. Waxa uuna ka cayriyay gorgorkii soo weeraray.




Libaaxii oo dhutinayo ayaa markuu guux iyo gurxan isku daray, ayuu u dhaqaaqay dhanka iyo geedkii uu gorgorku saarnaa. Wuxuu ku booday laan geedka ku taalay markaas ayuu riin iyo ruxis isku daray. Gorgorkii ayaa geedkaa ka haaday, kuna degay geed ka yara fog halka ay joogaan libaaxa iyo doofaarku.

Libaaxii ayaa doofaarkii ku yiri:


“Doofaar, soco oo biyaha cab anigaa gorgorka kaa ilaalinayee.” Doofaarkii oo si taxadir ah u socda, hareerahana iska eegayo, ayaa hiladii ku dhacay biyihiina ka dhergay. Doofaarkii oo dhergay ayaa libaaxii ku yiri:” Anaa hadda kaa ilaalinayee, kaalay biyaha cab”. Libaaxiina waxa uu aqabalay waxa uuna u hinqaday xagay biyuhu ku jireen.

Sidii ayuu libaaxii isna ku biyo cabay. Markii labadaba ay dhargeen ayaa doofaarkii ku yiri: “Libaaxow, dhoomaal ma cuntaa?” “Maya, ee adiga hilib ma cuntaa?” ayuu libaaxii isna weydiiyey. “Maya, ee maxaa isku keen diray, oo aan isku dilaynaa?” ayuu doofaarkii yiri. “Berriga iyo biyaha aan wadaagno, ayaa isku keen diray!” ayuu libaaxii yiri.



Doofaarkii oo xikmad la soo daristay baa talo ahaan ku yiri: “Libaaxow, berriga naga ballaadhan, biyahana naga badan. Oo waa nagu wada filan yihiin, ee haddaan isdeyno, maxaa ka qabtaa?” Libaaxii oo qabweynidii lagu yaqaanay wali ku jirto ayaa yiri: “War aniga boqorkii duurjoogta ayaan ahay, ee maxaa talo ah?”

Doofaarkii oo mar labaad libaaxa u caqli celinaya ayaa wuxuu ku yiri: “Aw libaaxow, nabad iyo saaxiibtinimo oo lagu degnaado, ayaa seef kasta ka wanaagsanee, maad nabada qaadatid. Saaxiibtimada haba noo danbeysee?” Libaaxii oo dabuubta doofaarka markaan garwaaqsaday ayaa yiri: “Oo haddaan saaxiibno, oo iskaashanno, oo iskaalmeysano, sow kama fiicna.



inta aan nabad uun ku ekaan lahayn?”
Wuu siduu rabay doofaarka, wuxuuna
isagoo faraxsan ugu jawaabay,
“Haa, oo marka aan biyaha soo
doonaneyno aan isasoo raacno, oo
gorgorka iska difaacno. inta kalena
qofba dantiisa ha raacdo.” Libaaxii
baa markaas yiri: “Ma kaa wacad iyo
balanbaa?” Doofaarkiiba ayaa isna ugu
jawaabay: “Waa iga wacad iyo balan!”
Halkiibeyna ku saaxiibeen, nabad iyo
naruurana ugu wada noolaadeen.

Gunaanadka

Sheekadani waa mid muujinaysa sida uu iskaashiga wanaaga u leeyahay. Waa mid muujinaysa xilkasnimada ay tahay in ruuxu muujiyo si loo gaadho nabad iyo iskaashi joogta ah. Waana mid inoo cadaynaysa in wadhadalku yahay shayga kaliya ii lagu dhamayn karo khilaaf iyo kala shaki jira. Hadii taas la sameeyana waxaa hubaal ah in bulshadu horumar iyo nabad gaadhayaan.

Laylis

Ka jawaab su'aalahn soo socda

1. Xagay isugu yimaadeen doofaarka iyo libaaxu?
2. Maxay isku qabsadeen doofaarka iyo libaaxu?
3. Doofaarku dhaawac noocee ah ayuu gaadhsiiyay libaaxa?
4. Doofaarkase maxaa dhaawac ah oo la gaadhsiiyay?
5. Maxay ku heshiiyeen doofaarkii iyo libaaxii?

